

## 'A HJUMARA I VACALI

Vacali mi perduni se mmi 'mpicciu  
Di comu fusti e ccomu resti ancora,  
di quando nc'era cu faccia lu bbricciu  
e rina cu lu crivu mentia fora.

Nc'è puru cu ricorda ca na vota  
Ammènz a l'acqua tua bbedha e pulita,  
l'angidha si piscava cu la trota  
ch'avianu carni duci e ssapurita.

Lu chiùppu non nc'è cchiù 'ntra la sipàla  
Mu ciangi e ppepmu frischia cu lu ventu,  
pemu trattèni l'acqua , quandu cala ,  
ti misaru 'ntra na bbrighia di cimèntu.

E bberu ca calavi presentusu ,  
l'àrburi arrocùlandu e li pagghiàra ,  
quandu lu celu si faccia cupùsu  
allargavi lu linu e la ggiogghiàra.

Eri servàggiu e ssi addomesticatu,  
mma tu , Vacali meu, no ssi lu stessu,  
mi pari 'nu pudhìtru 'mbardaccàtu  
cu cciancànèdhi ammènz a lu progressu

trent'anni arrètu puru jeu venia  
mu pigghiu l'acqua cu la gozzarèdha  
e mmi scialava quandu la mbivia ,  
mi ricrijàva stòmacu e ggudèdha.

L'acqua suffrigna mò la cumbogghiàru  
E ppuru chida chi ssentia di ferru,  
si jettava lu bagnu lu cotràru  
e nnescia fora chi pparia 'nu verru.

No nc'è cchiù l'armacera e la 'nchiuppata  
vicinu l'acqua frisca e trasparènti ,  
chi pemmu trova jia 'Ntoni Cannata  
e tti faccia 'nu quattru ammènz a nenti.

Spariu puru lu scrittu a la Pischera  
Chidu latinu , fattu a lu spagnòlu ,  
Chi ttu vidisti sempì quandu nc'era ,  
e 'nnu 'gnurànti fici u pigghia u volu !...

Restau la putighèdha sdarrupata  
cu 'ntra la cona misu San Giuseppi,  
chidha ch'è ddi la ripa a la calata  
e li preghèri me' passando seppi.

Restau. mma finn'a qquandu resta ancora ?  
Li casi ggià arrivàru a la Catina  
Ccarcunu a San Giuseppi 'u caccia fora  
Pemm'azzippa 'na pompa di benzina

*Francesco Laruffa*

[www.associazionelaruffa.org](http://www.associazionelaruffa.org)